

# NEWSLETTER

*mart 2024.*



**FONDACIJA**  
HASTOR

*Nejla Dedić*



# Potpisani ugovori o stipendiranju s kandidatima koji su ostvarili pravo na stipendiranje po Konkursu za nadarene/talentovane učenike/ce

Fondacija Hastor je u januaru 2024. godine, u cilju pružanja podrške što većem broju mladih ljudi kojima je obrazovanje imperativ, pored redovnog, prvi put raspisala i Konkurs za nadarene/talentovane učenike/ce osnovnih i srednjih škola u Bosni i Hercegovini. Obilježavajući punoljetstvo postojanja, ovoga puta napravljen je iskorak u mnogim segmentima, a jedan od najznačajnijih svakako je i objavljivanje spomenutog konkursa na koji je pristiglo blizu 2.500 prijava.

Po završetku konkursne procedure, pravo na stipendiranje ostvarili su najuspješniji učenici s kojima je 30. marta tekuće godine održan sastanak i potpisani prvi ugovori o stipendiranju. Na sastanku je direktorica Fondacije Hastor Lejla Đonlagić predstavila dosadašnje djelovanje, misiju i ciljeve Fondacije Hastor, ali i njen dugogodišnji pozitivan utjecaj na bosanskohercegovačko društvo. Direktorica Đonlagić nove stipendiste upoznala je i s programom volontiranja i njihovim budućim volonterskim angažmanom u okviru Fondacije Hastor i predstavila koristi istog kako za njih same tako i za zajednice u kojima žive. Novim stipendistima detaljno je

izložen i program stipendiranja i pažljivo su upoznati s budućim pravima i obavezama koje će imati kao stipendisti Fondacije Hastor.

Mnogi od njih iskazali su zadovoljstvo i ponos zbog činjenice da su postali stipendisti, a pozitivne impresije našle su se i kod roditelja koji su istakli zahvalnost s obzirom na to da je Fondacija Hastor pružila priliku nadarenim i talentovanim učenicima da nastave marljivo raditi i učiti i biti bolji u onom što rade:

*Želim da zahvalim Fondaciji Hastor na stipendiji. Pošto je Jovan postao stipendista ove Fondacije, ja kao roditelj osjećam ponos i sreću što će imati priliku rasti, sazrijevati i graditi prijateljstva uz druge uspješne i vrijedne stipendiste. Fondacija Hastor misli na našu djecu, nagrađuje ih za njihov trud, dosad one koji su u teškoj finansijskoj situaciji, a sada, evo, i one koji su dobri sportisti, učenici i umjetnici. Budućnost je u našoj djeci i trebalo bi više ovakvih fondacija u BiH, kazala je Radosna Sladoje, majka našeg stipendiste Jovana.*





Važno je naglasiti da raspisivanjem Konkursa za nadarene/talentovane učenike/ce nismo zanemarili učenike i učenice iz porodica teže socio-ekonomskog stanja. Fondacija Hastor već dugi niz godina pruža podršku učenicima iz porodica teže socio-ekonomskog stanja. Samo u ovoj školskoj godini po našem redovnom konkursu primili smo blizu 400 osnovaca i srednjoškolaca iz cijele Bosne i Hercegovine, a trenutno je u toku konkursna procedura za odabir učenika koje ćemo stipendirati u narednoj, 2025/26. školskoj godini.

Po našem Konkursu za nadarene/talentovane učenike/ce pravo na stipendiranje ostvarilo je ukupno 93 učenika s područja cijele Bosne i Hercegovine i sa zadovoljstvom naglašavamo da je kroz novi program podrške Fondacije Hastor pažnja usmjerena i na nadarene i talentovane učenike koji postižu izvanredne rezultate na različitim poljima kako nastavnih tako i vannastavnih aktivnosti. Na ovaj način Fondacija Hastor je još jedanput uspješno ostvarila svoj cilj pružanja prilika učenicima koji predano rade na svom obrazovanju kako bi izgradili bolju i perspektivniju budućnost, ali i pozitivno okruženje za sve nas.

Naš novi stipendista Haris Halilović kazao nam je šta za njega znači to što je postao dio Fondacije Hastor i kako vidi njenu ulogu u svojoj budućnosti:

***Veoma sam sretan što sam postao jedan od mnogobrojnih dobitnika vaše vrijedne stipendije. Vjerujem da ću imati priliku upoznati vaše brojne volontere, stipendiste, i da ću kroz aktivan zajednički volonterski rad unaprijediti svoje organizacione sposobnosti i postati vrijedan član Fondacije Hastor, te ličnim primjerom dati svoj doprinos u radu lokalne zajednice.***

Ni naša nova stipendistica Iman Škrebo nije krila oduševljenje i zahvalnost zbog činjenice da ima priliku razvijati se u okviru Fondacije Hastor:

***Biti stipendista Fondacije Hastor za mene znači priliku za akademski i lični razvoj, bolji pristup znanju i mentorstvu koje će mi pomoći da ostvarim svoje profesionalne ciljeve. Vidim svoju ulogu unutar Fondacije kao aktivnog člana zajednice, spremnog da doprinese svojim idejama i radom ostvarenju misije Fondacije u podržavanju obrazovanja i razvoja mladih talenata. Ova stipendija predstavlja ne samo priznanje za moj dosadašnji rad, već i odgovornost da se kontinuirano usavršavam i doprinosim društvu u kojem živim.***



Izuzetno smo ponosni na činjenicu da se zajednica Fondacije Hastor svakodnevno širi, ali i rezultate i uspjehe koje naši stipendisti postižu. Naša misija iz dana u dan postaje realnost, a naši stipendisti godinama već odrastaju uz nas i postaju zreli, odgovorni i obrazovani ljudi.

Svim našim novim stipendistima želimo toplu dobrodošlicu uz želju da nastave postizati još veće i značajnije uspjehe koje ćemo sa zadovoljstvom podržati.

**Pripremila: Adelisa Begić**



## Predstavljanje novih stipendista

I ovog mjeseca nastavljamo s predstavljanjem pozitivnih priča naših novih stipendista koji svojim radom i trudom dokazuju zašto su upravo oni postali dio naše velike porodice. Također, nastojimo istaći kako Fondacija Hastor svakim danom raste i postaje bogatija mladim i aktivnim ljudima koji se trude da svoju budućnost, ali i okruženje u kojem živimo učine ljepšim mjestom za život svih nas. Ponosno ističemo kako Fondacija svakodnevno ulaže u uspjehe svojih stipendista, a oni prepoznaju prilike koje im nudi i koriste ih na najbolji mogući način.



**Emina Šaćirbegović** dolazi iz Zenice. Studentica je druge godine Ekonomskog fakulteta Univerziteta u Zenici. Emina je posvećena karateu već četrnaest godina i danas nosi zvanje licencirane trenerice i ispitivačice u karateu. Emina nije samo usmjerena na sportske aktivnosti, već je aktivna i u akademskom okruženju te s grupom studenata svog fakulteta aktivno radi na implementaciji raznolikih projekata sa svrhom unapređenja studentske zajednice.

*Ove godine postala sam i stipendistica Fondacije Hastor. Svidio mi se princip u kojem se studentima daje prilika da nauče nešto novo, međusobno se upoznaju te da razvijaju svoje komunikacijske vještine kroz volonterski angažman u osnovnim i srednjim školama. Radujem se i budućem volonterskom angažmanu u Fondaciji i svom ličnom napretku te se nadam da ću pozitivno utjecati na učenike s kojima budem volontirala.*



**Nerma Konjić** dolazi iz Tuzle. Studentica je druge godine Pravnog fakulteta Univerziteta u Tuzli. Pravni fakultet upisala je jer smatra da odgovara njenim željama i ambicijama s obzirom na to da je to način na koji svojim radom i zalaganjem doprinosimo ukupnom poretku u društvu. Nerma ističe kako je tokom odrastanja oduvijek bila prepoznata po svojoj izuzetnoj posvećenosti volonterskom radu.

*Za Fondaciju Hastor saznala sam tako što mi je prijateljica prosljedila link konkursa te sam odmah prepoznala da je to odlična prilika za mene te da se poklapa s mojim željama i interesovanjima. Mnogo mi je značilo to što sam izabrana da budem stipendistica Fondacije Hastor te smatram da ću za vrijeme svog angažmana mnogo novih stvari naučiti i postići. Imam veliku želju napredovati te vjerujem da ću to u okviru ovakvog okruženja i ostvariti.*





**Aldijana Makalić** stipendistica je koja dolazi iz Gojčina, općina Kalesija. Vrijedna je studentica druge godine Pravnog fakulteta Univerziteta u Tuzli. Kroz svoje srednjoškolsko obrazovanje upoznala se s konceptom volonterskog angažmana, a isti, kako ističe, ima u planu nastaviti razvijati kroz iskustvo u Fondaciji Hastor:

*Želim izraziti iskrenu zahvalnost Fondaciji Hastor na pruženoj prilici. Ponosna sam na to što sam postala dio porodice njenih stipendista. Podrška Fondacije Hastor nikada nije bila samo finansijska, već je i motivirajuća. Postavši stipendistica osjećam da imam snažnu podršku na putu ostvarenja akademskih i ličnih ciljeva. Vizija Fondacije Hastor u obrazovanju i razvoju mladih ljudi poput mene motivira me da nastavim nizati svoje uspjehe.*

**Ismar Šindrić** dolazi iz Tuzle i student je treće godine Medicinskog fakulteta Univerziteta u Tuzli na Odsjeku za opći studij medicine. Izvanredni uspjesi tokom obrazovanja, uključujući i Dekanovu nagradu, svjedoče njegovoj predanosti i ljubavi prema medicini. Za Fondaciju Hastor saznao je zahvaljujući informacijama koje mu je prenijela kolegica, također naša stipendistica. Ismarov cilj je da nakon završenog studija kroz svoj rad i posvećenost doprinese unapređenju zdravstvenog i obrazovnog sistema u Bosni i Hercegovini:

*Oduvijek sam želio doprinositi društvu u kojem se nalazim. Za mene je volonterski rad spas za društvo i okolinu u kojoj se nalazimo te sam se, zapravo, ponajviše zbog toga i prijavio na konkurs koji je raspisala Fondacija Hastor u oktobru 2023. godine.*

**Pripremila: Semina Sadiković**





## Dženeta Halilović

Fondacija Hastor godinama razvija svoje djelovanje afirmirajući volonterski angažman mladih ljudi i jačajući na taj način vezu između mladih pojedinaca i zajednica u kojima žive. Naša ovomjesečna rubrika Stipendista mjeseca donosi priču mlade i ambiciozne stipendistice koja već godinama u okviru Fondacije Hastor pravi velike korake gradeći svoju ličnost na temeljima altruizma i posvećenosti volonterskom angažmanu. Zbog iskrene posvećenosti volontiranju i nastojanja da svoje slobodno vrijeme uloži u korisne stvari, **Dženeta Halilović** ovoga mjeseca zasluženno nosi titulu Stipendistice mjeseca Fondacije Hastor.

Dženeta Halilović porijeklom je iz Sarajeva i već punih deset godina stipendistica je Fondacije Hastor. Njen obrazovni put u Srednjoj medicinskoj školi „Jezero“ osnova je za njeno dalje usavršavanje u medicinskoj struci. Trenutno je treća godina prvog ciklusa studija na Fakultetu zdravstvenih studija – Odsjek za babičarstvo/primaljstvo.



Timski rad jedna je od najvažnijih vještina koju stipendisti Fondacije Hastor mogu razviti kroz volonterski angažman. Osim toga, volontiranjem se stvara osjećaj zajedništva, solidarnosti i odgovornosti prema drugima. Kao i za mnoge stipendiste, Fondacija Hastor Dženeti je otvorila mnoga vrata i proširila vidike ka različitim sferama života. Ona ističe kako je upravo njena vezanost za Fondaciju Hastor nerijetko bila putokaz kojim smjerom želi ići kroz život te je iz godine u godinu gradila svoju ličnost utkavši u nju niti Fondacije Hastor i učinivši je tako neizostavnim dijelom sebe.

***Kao sada već desetogodišnja stipendistica Fondacije Hastor ostvarila sam značajna poznanstva koja još uvijek traju i šire se. Kroz rad u timu, stipendisti i stipendistice Fondacije Hastor s vremenom su postali i moji prijatelji s kojima imam odličnu komunikaciju.***



S obzirom na to da je stipendistica skoro 10 godina, Dženeta je kroz Fondaciju Hastor volontirala najprije kao učenica u svojoj mentorskoj grupi, a potom je i sama osjetila posebnost mentorstva volontirajući sa svojom grupom stipendista. Danas Dženeta volontira u administrativnom timu čime, kako ističe, svakodnevno uči nove vještine, a pritom se osjeća korisno znajući da brojne molbe za stipendiju prolaze upravo kroz njene ruke i da na taj način ima priliku činiti nešto istinski dobro za društvenu zajednicu.

***Smatram da svojim vrijednim zalaganjem itekako doprinosim timskom radu, međutim, moja komunikativnost i socijalna osviještenost vode glavnu ulogu. Fondacija Hastor mi kroz sve ove godine pruža priliku da svoju energiju i želju za unapređenjem našeg društva usmjerim na prave puteve.***



Dženeta je ambiciozna osoba koja teži uspjehu u svemu što radi. Njene ambicije je motiviraju da stiče nova znanja i vještine te da napreduje i na polju svoga budućeg zanimanja. Na pitanje šta je to što je privuklo da upiše ovaj smjer, Dženeta je odgovorila:

***Shvativši važnost očuvanja ženskog reproduktivnog zdravlja te činjenicu da se o toj temi premalo govori, zaključila sam da je potrebno podignuti svijest i ukazati na važnost intimnog zdravlja na cjelokupno psihofizičko stanje žene.***

Ona kontinuirano prati i učestvuje u različitim oblicima edukacije i kongresima koji su relevantni za njen poziv. Cijeni priliku da se poveže i razmijeni iskustva s drugim stručnjacima iz svoje oblasti. Za kraj je još jedanput istaknula važnost uloge Fondacije Hastor u njenom životu:

***Fondacija Hastor pomaže mi u mom nastojanju da svojim radom činim promjene u društvu u kojem živim i usmjerava me da svoju obrazovnu i društvenu aktivnost podignem na viši nivo, a svoju biografiju obogatim za još jedno vrijedno životno iskustvo.***

**Članak pripremila: Semina Sadiković**



## Venesa Karić



Rubrika aktivnih mladih predstavlja odjeljak našeg Newslettera za koji rado biramo priče naših najuspješnijih stipendista. Pred nama je uvijek veoma težak zadatak jer svi uspjesi naših stipendista neiscrpan su izvor motivacije kako za naše stipendiste tako i za sve druge naše čitatelje. Ovaj mjesec imamo čast i zadovoljstvo predstaviti našu stipendisticu **Venesu Karić** koja dolazi iz Zenice, gdje je završila svoje osnovno i srednjoškolsko obrazovanje. Trenutno je studentica Internacionalnog Burch Univerziteta u Sarajevu, gdje pohađa četvrtu godinu Fakulteta za edukaciju i humanističke nauke – smjer Digitalne komunikacije i odnosi s javnošću. U nastavku imate priliku čitati o Venesinom putu ka uspjehu i ulozi Fondacije Hastor na istom.

Kroz razgovor s Venesom shvatili smo da mladi ljudi poput nje svoje vrijeme itekako cijene i iskorištavaju na najbolji mogući način. Za Venesu slobodno vrijeme i produktivnost znače uloženo vrijeme u kvalitetne segmente života koji će je inspirisati, ispuniti i dovesti na višu stepenicu. Svoje znanje i pozitivne promjene Venesa nastoji staviti na raspolaganje cjelokupnoj zajednici, a Fondaciju Hastor vidi kao prostor koji joj to omogućava na različite načine. Trenutno volontira kao vođa tima za društvene mreže te ističe kako je kroz ovaj vid volontiranja razvijala svoje komunikacijske i liderske vještine, a pri tome je još kao studentica imala priliku praktično koristiti svoje znanje. Volonterska iskustva značajno su obilježila Venesin životni put te o njima sa zadovoljstvom govori:

*Svoje prvo volontersko iskustvo stekla sam u četvrtom razredu srednje škole, kada sam postala članica internacionalne nevladine omladinske organizacije AIESEC. Kasnije sam počela dodatno istraživati prilike u svojoj okolini pa sam tako imala priliku biti dijelom različitih nevladinih organizacija kao što su PRONI Centar za omladinski razvoj, Rotaract klub, gdje sam obnašala i ulogu predsjednice, i Erasmus Student Network. Kao posebno volontersko iskustvo izdvajam i svoj angažman u okviru Fondacije Hastor, gdje sam imala priliku steći brojne vještine i iskoristiti svoje znanje stečeno na fakultetu.*



Pored spomenutih iskustava, pohađala je i programe neformalnog obrazovanja poput SHL Akademije za mlade lidere u civilnom društvu, AFW Akademije političke pismenosti mladih u BiH te obuke za pisanje BOLD projekata. Bila je i jedna od dobitnica BOLD granta, zahvaljujući kojem će u maju ove godine realizirati projekt „CareerLeap Summit“. U slobodno vrijeme Venesa se bavi plesom, a okušala se u brojnim disciplinama poput klasičnog plesa, modernog plesa, karakternog baleta, latina i društvenih plesova. Bila je i članica baletnog ansambla ArsCentra u Zenici.

Uz sve navedeno, Venesa je u prethodne dvije godine iskoristila prilike Erasmus programa posjetivši Češku, Njemačku, Mađarsku i druge zemlje Evrope. Trenutno je učesnica i jedna od dvoje predstavnika Bosne i Hercegovine u obuci za lidere interkulturalnih razmjena. Ovaj program realiziraju OFAJ i VCV, a završni modul održat će se u maju ove godine u Srbiji.

S obzirom na pozitivna iskustva kroz prethodno navedene aktivnosti, Venesa ističe kako je s vremenom postala otvorenija, pristupačnija i veoma samouvjerena osoba i kako su tome velikim dijelom doprinosile i njene volonterske aktivnosti u okviru Fondacije Hastor gdje je imala mogućnost i priliku naći se pred različitim izazovima i naučiti kako ih prevazići. Naučila je njegovati različitosti, ne odustajati pred izazovima i prvim preprekama i ne plašiti se upuštanja u nove avanture.

Našim ostalim stipendistima, ali i svim mladim ljudima Venesa poručuje da iskoriste benefite volontiranja koje predstavlja idealnu priliku za mlade ljude, a ona sama je pravi primjer za to. Zahvaljujući skupljenom volonterskom iskustvu naša sagovornica dobila je priliku za pohađanje željenog fakulteta, gdje uskoro završava svoj studij. Proputovala je mnogo, upoznala različite kulture, stekla neprocjenjiva prijateljstva i poznanstva, što je za nju, kako kaže, i najveće bogatstvo.

**Članak pripremila: Hana Kolasević**





## Esma Husika Fazlić

Fondacija Hastor ima veliku ulogu u životu svih njenih stipendista, kako sadašnjih tako i bivših. Ona ih motivira da nikad ne odustaju od svojih ciljeva i da uvijek idu naprijed nastojeći biti bolji. Često je Fondacija najveća, a nekad i jedina podrška u životu njenih stipendista. Nekadašnji stipendisti Fondacije Hastor često se, puni sjeće, prisjećaju različitih životnih momenata u kojima im je bio neophodan neko ko će bezuvjetno vjerovati u njih. Ponosno ističu da se u takvim trenucima njihovog života pojavila Fondacija Hastor kao njihov najveći oslonac. Upravo je našoj bivšoj stipendistici **Esma Husika Fazlić** Fondacija Hastor bila oslonac u ključnom periodu života kada joj je trebao neko ko će vjerovati u nju, pružiti joj podršku i pomoći joj da se približi ostvarenju snova.

Esma Husika Fazlić dolazi iz Kaknja, gdje je završila osnovnu i srednju školu. Studirala je na Filozofskom fakultetu u Sarajevu, na Odsjeku za anglistiku. Njen volonterski angažman u Fondaciji Hastor trajao je četiri godine, kada je imala priliku učestvovati i u obuci za pripravnike, koju je organizirala Fondacija Hastor, što ju je odvelo korak dalje pa je dobila šansu da volontira na Al Jazeera Balkans 2012. godine. Nakon godinu dana volonterskog angažmana primljena je u radni odnos na Al Jazeera, gdje i danas radi kao prevoditeljica za engleski jezik, i to više od jedne decenije. Taj posao traži budnost, koncentraciju i spremnost za istraživanje uvijek novih tema. To Esma nije predstavljalo prepreku na poslu budući da se u Fondaciji Hastor ugledala na starije stipendiste koji su uvijek bili fokusirani i spremni za nove izazove. Osim toga, Esma je volontirala i kao mentorica stipendistima koji su učenici osnovnih škola.





Kako je Fondacija Hastor zasnovana na altruizmu i nastoji to prenijeti na stipendiste, Esmu je kroz svoj mentorski angažman učenicima stipendistima nesebično prenosila znanje iz engleskog jezika, ali i drugih nastavnih predmeta. Nadalje, Fondacija Hastor prepoznala je njen potencijal te je imala priliku volontirati i u administrativnom i redakcijskom timu, gdje je mogla pokazati svoje vještine i raditi na njihovom unapređenju. S obzirom na bogat volonterski angažman, za Fondaciju je vežu samo najljepša sjećanja, a kao posebnu uspomenu izdvaja putovanje u Holandiju, gdje je putovala u ulozi vodiča učenicima koji su u Holandiji proveli tri sedmice.

Kako je riječ o mlađoj djeci kojima je to često bilo prvo duže putovanje bez roditelja, vodiči su im u to vrijeme bili i prevodioci i zamjena za roditelje. U Holandiji je Esmu stekla nova poznanstva, a neka od njih prerasla su u prijateljstva koja traju i danas pa je i svoju najbolju prijateljicu upoznala upravo u Fondaciji Hastor. Njihova je prijateljska veza i danas čvrsta, a nada se da će njihova djeca nastaviti to prijateljstvo. Esmu danas s ponosom svom sinu govori o Fondaciji sa željom da i u njemu probudi zahvalnost koju ona osjeća jer je upravo Fondacija Hastor Esmu otvorila vrata u poslovni svijet, na osnovu čega njemu danas može pružiti mnogo toga, ali i odmalena ga učiti altruizmu i prenositi mu pozitivne vrijednosti.

**Mogu reći da je Fondacija Hastor za mene značila dvije stvari: podršku i odskočnu dasku. Podržala su me finansijski onda kada mi je to bilo najpotrebnije, a bila je i moj most do vlastitih finansija i profesionalnog iskustva od ogromnog značaja. S ponosom ističem da sam bila stipendistica Fondacije Hastor i s njenim radom upoznajem ljude od kojih mnogi ranije nisu čuli za nju. Ljudi se kreću u nekim svojim mikrokrugovima nesvjesni velikog dobra koje za ovu državu i ovo društvo čini vojska mladih pametnih i marljivih ljudi – stipendista Fondacije Hastor. Ponosna sam što sam i sama u jednom dijelu svog života bila dio te marljive vojske.**



Još jedan važan segment u njenom volonterskom radu bili su mjesečni sastanci koji su se znali pretvoriti u dinamične rasprave i dogovore u vezi s raznim stvarima i problemima s kojima se suočavala u radu. To joj je veoma značilo jer je zahvaljujući sastancima osjetila veliku podršku starijih stipendista, ali je i pružala podršku mlađim stipendistima. Ističe da je kroz volonterski angažman razvila empatiju, a i stekla važne poslovne vještine koje su joj kasnije veoma značile za posao kojim se bavi. Stoga, mladim ljudima poručuje da budu uporni, istrajni i da se uvijek trude. Jedino tako mogu ostvariti svoje snove:

**Ne odustajte od svojih snova, ali ni od obaveza. Sve što danas naučite, olakšat će vam život sutra i otvoriti put ka novim prilikama o kojima sada možda samo sanjate, a one su tu, na korak od vas. Taj korak zove se zdrave radne navike. Ne vjerujem da je rad stvorio čovjeka, ali vjerujem da ga oblikuje u osobu koja doprinosi i vrijedi. Vrline kao što su odgovornost, marljivost, upornost, kojima nas u konačnici i uči Fondacija Hastor, univerzalni su jezik koji će vaše snove pretvoriti u javu.**

**Članak pripremila: Aldina Šaljić**




## Kreativni kurs o primjeni Adobe Photoshopa Lejle Fejzić

Kada kročite u čarobni svijet volonterizma, uočit ćete da će vas nešto iznova i iznova vraćati u njega. Neka želja će vas voditi ka tome da nižete nova prijateljstva, nove uspomene i mnogo novih aktivnosti. Međutim, kada to volontiranje spojimo s onim što istinski volimo, tada se ono pretvara u naš pravi maleni i posebni svijet. **Lejla Fejzić**, studentica i naša stipendistica, dobila je priliku da svoje volonterske sate zasniva upravo na onome što nju čini najispunjenijom, a time je privukla našu pažnju i nesumnjivo zaslužila svoje mjesto u ovoj rubrici.

Lejla Fejzić ima 22 godine i dolazi iz Ilijaša, gdje je završila osnovnu i srednju školu. Trenutno je studentica treće godine grafičkog dizajna i multimedija na Internacionalnom Burch Univerzitetu. Iako je Lejla s nama tek godinu dana, na pitanje šta za nju znači biti stipendista Fondacije Hastor, nije znala odakle krenuti, navodeći da ima puno toga za reći.

*Biti stipendista Fondacije mnogo je više od finansijske podrške, to je prilika za rast i učenje i velika privilegija koja mi omogućava da se fokusiram na svoje obrazovanje i da svojim radom doprinesem zajednici i uzvratim podršku koju sam dobila.*

Lejlina ljubav prema dizajnu i umjetnosti potječe još iz srednjoškolskih dana, a kako Fondacija Hastor nastoji potaknuti svoje stipendiste u razvijanju interesa kroz volonterske aktivnosti, Lejline cjelokupno volontiranje bazirano se upravo na temama koje se tiču grafičkog dizajna o kojem ima puno toga kazati i podučiti druge. Novi model volontiranja u Fondaciji Hastor, implementiran početkom tekuće školske godine, pruža mogućnost da učenici stipendisti, između ostalog, uče razne vještine usvajajući znanja iz brojnih oblasti koje im prenose naši studenti stipendisti i na taj način šire svoje vidike i svoje dijapazone znanja. Radionice koje Lejla vodi zamišljene su kao kurs Adobe Photoshop-a za naše stipendiste srednjoškolce i naša volonterka nam je opisala kako zapravo izgleda jedna od tih radionica.





Na samom početku, učenici su imali zadatak instalirati program koji im je neophodan za praćenje kursa, a potom ih je Lejla uputila u sve opcije koje program nudi. Jedan od prvih izazova bio je da spoje dvije fotografije u jednu i dodaju neki svoj kreativni detalj na fotografiju. Lejla ističe kako na ovaj način mlade stipendiste uči da budu kreativni i da na pravi način koriste resurse koje imaju, a mnogi od njih oblast grafičkog dizajna već sada prepoznaju kao svoje buduće zanimanje.

*Radionice su koncipirane kroz deset faza, pružajući učenicima temeljno razumijevanje Adobe Photoshop-a. Nakon prolaska kroz ove faze, učenici će biti sposobni samostalno koristiti alate i primjenjivati stečeno znanje u različitim aspektima svoje edukacije. Svaka od radionica zamišljena je u dva segmenta. Prvi obuhvata detaljno objašnjenje alata u Adobe Photoshop-u i njegovu primjenu. U drugom segmentu radionice učenici, uz moju asistenciju, implementiraju stečeno znanje kroz praktičan rad i zadatke, navodi Lejla, i na taj način pobliže nam pojašnjava same korake radionice.*



Koliko nam podrška i pozitivna povratna informacija znače, možemo uvidjeti i na Lejlinom primjeru. Već nakon prve održane radionice jedna od učenica zahvalila je Lejli na njenom nesebičnom zalaganju i svemu korisnom što ih je podučila. Poruka je bila prepuna pohvala, a Lejla je i s nama podijelila dojmove učenice Arnele Mujić koje je ponijela s njenih radionica:

*Radionica s Lejlom jedno je prelijepo iskustvo. Kroz inspirativnu prezentaciju omogućila je meni i svim prisutnima da naučimo toliko toga, a njen način prezentiranja bio je izvanredan. Svojim pristupom i ogromnom ljubavlju prema onome što radi ohrabрила je i mene da dublje istražim područje koje je predstavila i nastavim svoj put s novom inspiracijom kojom me nadahnula,* kaže nam Arnela.

Lejla je jednom porukom dočarala svoju bogatu volontersku priču i privela naš intervju kraju:

*Poručila bih svim trenutnim i budućim stipendistima Fondacije Hastor da cijene sve prilike koje im Fondacija pruža. Potičem vas da iskoristite svaku ponuđenu mogućnost, učestvujete u svakoj aktivnosti s ciljem učenja i razvoja vlastitih vještina jer će nam to, bez sumnje, biti od neprocjenjive koristi u budućnosti.*





## Monolog tišine

Slušaj  
Tišinu  
Samo nauči  
Slušati  
Doziva  
Skrivene  
Dijelove  
Tvojih  
Uspomena  
Možda te zove  
Tvoja  
Podsvijest  
Govoreći  
Kako još  
Ostaju tu  
U novoj ulozi  
Nešto više  
Od uspomena  
Nešto u balansu  
Stvarnosti

**Semina Sadiković**



**FONDACIJA**  
HASTOR



### Kontaktirajte nas!

Bulevar Meše Selimovića 16,  
Sarajevo  
033 774 789  
033 774 823  
fondacija@hastor.ba



### Redakcija

Almina Šabanović-Kokot  
Adelisa Begić  
Amina Bašić  
Semina Sadiković  
Hana Kolasević  
Aldina Šaljić  
Aida Suljić



### Grafički dizajn

Sara Keserović



### Naslovnica

Nejla Dedić